



Presem pikinini blong yu oltaem

Long pikinini, pleplei blong hem i olsem wan had wok. Taem yu luk hem i stap traem blong mekem wan gudfala samting yu presem hem long efot blong hem.



IMPOTEN MESEJ

Long ej ia lening i stap tekem ples taem pikinini i stap pleplei. Yu mas soem interes long ol wok blong hem. Spendem kwaliti taem blong pleplei mo toktok wetem pikinini. Taem pikinini i redi blong toktok yumi mas redi blong lisen mo lukluk hem long ae blong hem.

**Blong kasem moa infomesen,
kontaktem Eli Jaelhud seksen
long Ministri blong Edukesen
mo Trening long fon namba
22309 o 33500**



Yumi Raet Tugeta

Hao yu save helpem pikinini blong hem i save divelopem ol skil blong raet?

- Spendem smol taem evri dei blong tokbaot o aprisietem ol mak (ol skribel) o ol droing we pikinini blong yu i stap mekem long haos o long kindi. Taem pikinini i karem ol pepa oli kam bak long haos, yu askem blong hem i storian long wanem hem i raetem o droem long pepa.
- Lisen long pikinini taem hem i stap tokbaot o ridim stori/pija blong hem.



Wanem nao mi save mekem blong hem i redi gud blong go long klasrum mo save holem pensel?

Givim plante janis long pikinini blong ol kaen aktiviti olsem:

- Raet o dro long pepa, buk, sanbis, graon, spes o ea, blakbod, slet o ston.
- Pentem pija long pepa, wud o pentem wol blong haos wetem wota nomo.
- Kala wetem drai o wetwet jok.
- Katem pepa o lif wetem sisis.
- Terem pepa o lif mo pestem long pepa o pis katon.
- Pestem ol flaoa, sid, ston, wud, sanbis long lif wetem strong klu.
- Wivim lif o pepa o somap flaoa, sel, bambu o korel wetem string o bus rop.
- Bildim ol samting wetem ol blok, stik o pis wud.
- Pleplei wetem wota mo sanbis. Fulumap sanbis long wan kontena, kapsaedem mo mekem ol samting wetem wetwet sanbis.
- Sipos yu ting pikinini blong yu i redi blong raetem nem blong hem. Yu save raetem nem blong hem yusum ol smol leta mo hem i save kopi.

Hao nao bai mi save enkarejem pikinini blong mi blong i raet taem hem i stap long haos?

- Letem hem i save se sapos hem i wantem raet o dro, i gat pepa, blakbod, buk blong raet mo ol kreon, jok, pensel, maka o sakol oli stap blong hem i save yusum. Tijim hem blong no raet olbaot long wol blong haos mo long ol kaliko.
- Letem hem i luk se yu tu yu stap raet.
- Helpem pikinini long haos blong raetem nem blong hem wetem ol smol leta.
- Givim janis blong hem i raet o dro long sanbis.
- Taem yutufala i stap ridim buk, poen long ol wod.

